

本朝分省人物考

本朝京省人物考卷之一

南直督學御史西浙過庭訓纂集

門人蘇松備兵副使南郡熊膏叅閱

男 過銘盤

過銘孟

過銘篋

寧國府學生員嚴弘志全訂正

北直隸順天府

董倫

董倫字安常世居燕之宛平自處山林間布褐藜藿

已懷憂世之志學者多從之遊以所居貝川因稱貝川先生元末徵辟不出世高其行國初擢用單縣儒士張寧寧以倫薦徵爲春坊贊善大夫賜冠帶事

懿文皇太子陳說多長厚語 太祖高皇帝聞而善之陞左春坊大學士會東宮晏駕出爲河南左叅議盡心民事名其退食思政之堂日後樂嘗草封事數千言無一不當 上心者又上書薦肇州吏目諸葛伯衡 太祖遽擢爲陝西右叅議三十年以誥誤免官典教滇南倫行至成都蜀獻王深寵之賦詩八章以導行至滇凡作養成就用夏變夷漸摩膏煦皆出

於仁義道德故雖蠻童夷豎皆知向方 建文帝卽
位眷念東宮舊臣屢詢及之左右亦多言倫可用召
至京師慰勞備至拜嘉議大夫禮部右侍郎兼翰林
院學士與方孝孺同入內閣侍經筵御書怡老堂及
髹几玉鳩杖各一賜之初監察御史解縉以權臣讐
嫉譖之謫河州衛吏倫爲之言乃召縉還以爲翰林
待詔其汲引人材類如此倫爲人質直敦厚富文學
爲時所重建文間屢懇言當務親睦不聽 文皇卽
位時倫年八十餘有旨令致仕出京悒悒成疾數日
卒

竇承芳

竇承芳順天通州人洪武中以貢入太學永樂四年詔國子監選才識英敏者應科道之選承芳擢拜山東道御史大節磊磊侃直不避以建言下詔獄赦復原職尋建言忤旨謫龍江典史已復職陞浙江僉事卒

黃綬

黃綬順天平穀縣人洪武末年以奇童召見命送國子監讀書中宣德癸丑進士除拜山東道御史英廟北征綬䟽言兵玩備弛虜鋒正銳陛下柰何以

祖宗付託之身親犯危機乎不報扈 駕至土木寨
而師潰 大駕蒙塵綬奮節死焉

李慶

李慶順天府順義縣人洪武中以國子生署都察院
右僉都御史後授刑部員外郎陞紹興府知府永樂
元年召爲刑部侍郎五年改都察院右副都御史營
建北京陞工部尚書二十二年調兵部尋兼太子少
保 仁宗皇帝命侍 上謁 孝陵慶約束侍從將
士不敢秋毫犯民 上欲獵亦屢諫止遂留南京兵
部宣德二年安遠侯柳升等征交趾命慶叅贊軍事

至廣西病作及交趾境遂卒慶正直剛果遇事敢爲
不畏強禦深嫉脂韋媵媵者以嚴馭下以恕用法有
幹局其在刑部時所領事多不得數至部凡屬吏與
囚交通或私餽飲食慶輒知之加重罰衆畏憚不敢
肆 仁宗卽位慶請令直隸及各都司官軍更番於
京師操備 上嘉納之時大理寺少卿戈謙言事有
過於矯激者 仁宗不悅大臣呂震劉觀等交口傾
之賴 仁宗不聽時惟慶與夏原吉不語然自是言
事者少 仁宗悟遂降勅自引咎且勉諭謙又責羣
臣之嘗傾謙者震乃大愧於慶兩人時治山陵事多

趣辦中官或有過求慶執不與至相詆詰不爲動若
他事有未便亦侃侃爭論未嘗苟徇當時皆嚴憚之
號爲生李焉

劉士原

劉士原昌平人洪武中以才能薦舉擢山西潞州知
州有惠政及民陞陝西叅議累官左布政使應朝
至京止跨一蹇隨一僕帝廉得其實稱揚不已
命馳驛赴任時有天下清官劉士原之譽

劉英

劉英寶坻縣人洪武中仕爲山西繁峙知縣廉能守

法深得民心後秩滿縣人詣闕乞留詔復任仍命禮部書其政績超羣以曉示天下

甄庸

甄庸順天府宛平縣人洪武三十年舉人才授戶部主事有賢聲革除元年陞松江府知府端謹廉明政平訟簡永樂二年坐累降右軍都督府經歷三年以薦舉擢山西道監察御史出巡廣西激揚有體吏畏民懷四年召還陞工部右侍郎本年坐事免官五年復原職十九年定鼎北京尚書扈北命庸掌部事二十一年奉命成造冬夏衣給賜雲南官民生賂進

等并琉球官生周魯等役竣仍奏准自後依時給賜
不待奏請著爲令二十二年陞南京工部尚書宣德
元年兼掌兵部事二年致仕庸性凝重言若不出口
遇事處之綽有餘裕故人稱爲篤厚君子云

劉中敷

劉中敷順天府大興縣人 太宗舉兵靖難中敷以
府學生員守城有功授河南陳留縣丞遷工部管繕
司員外郎 仁宗嘗命署掌部事滿九載陞江西布
政司右叅議宣德二年遷山東布政司右叅政尋陞
左布政使正統初陞戶部尚書嘗坐事枷號於長安

門尋釋之一日被召問瓦刺來朝馬駝留養於大同者幾何合用草料幾何中敷不能對遂下獄論死久之宥爲民時中官王振方竊威柄故也景泰初復起爲戶部左侍郎尋兼太子賓客卒年七十有四遣官賜祭命有司具棺殮并營葬事以其子給事中璉乞恩復尚書仍兼太子賓客中敷爲人謹約食不重味每與僚友食殮殽品雖多惟食其近者一味而已居官幾四十年家無厚貲云

張 渙

張渙霸州人永樂初爲兵部郎中 成祖召至便殿

問以急務敷對剴切 上嘉之賜衣一襲玉硯一枚
尋擢山東左布政繼調陝西值歲饑賑恤全活甚衆
宣德二年廣東苗夷倡亂渙至宣布德威苗遂平秩
滿詣闕力陳休致

李季鼎

李季鼎大興人永樂初以國子生拜爲春坊贊善講
授經書深見禮待爲人博學強記當時號爲書庫及
致仕猶訪以時政宣德初以輔導功錄其子

薛斌

薛斌昌平人永樂中累立戰功進封永順伯子綬襲

伯曾從征虜寇沒於陣謚武毅

李素

李素平谷縣人永樂初年由國子生擢山西道監察御史朴實簡靜不炫風跡十年陞湖廣僉事繼進浙江副使俱用刑平恕於民不擾十四年陞湖廣叅政在楚最久行守廉介楚人多宜之仁宗嗣位召爲右副都御史宣德元年以事調福建按察使秩滿致仕卒於家

楊善

楊善字思敬大興縣人少補諸生不甚通經術而性

沈敏能爲人策事時年甫十七 文皇起義兵已知
善名署典儀所引禮舍人 文皇卽位之明年以守
城功召補鴻臚寺序班歷鳴贊司賓署丞再進右寺
丞繼擢爲卿善偉丰儀工舉止音吐如洪鐘每朝謁
引進奏時 上目屬之正統十二年進禮部左侍郎
明年從北征至土木師潰間行達京師時已六十五
矣足胠不倦虜犯京師以善曉暢軍事改都察院左
副都御史使佐于謙營九門外郭以與虜角數有功
進右都御史自侍郎至右都御史皆領鴻臚寺事是
時 太上皇在漠北元旦故事自朝正出卽相率於

朝房投謁稱賀善獨流涕曰此何時也 太上皇何
所而戎_子稱賀耶衆爲止時所遣使漠北若王復王
榮李實等皆以庶僚假卿佐往不得要領李實得一
見 太上頗倨而其辭慙虜挾 太上請賂欲奉之
還而朝意更緩至是以虜酋責王復等非大臣故遣
善再往然絕不爲奉迎計亦不予善一錢善乃悉其
貲不足則貸之中貴人悉益市綺繡女紅線釵之類
旣至也先所使館伴者來與飲帳中詫善曰土木之
役六師抑何弱耶善曰是時六師之勁悉南征而中
貴人振欲邀 太上幸故里積不爲戰備今者南征

之士悉歸可二十萬又募中外材官技擊得三十萬
悉教以神鎗砲火弩射命中百步之外洞人馬腹透
七扎又用言者計沿邊要害皆隱金椎三尺所值蹄
立穿刺客林立夜度營幕若猿猴而皆已置之無用
矣問何言無用曰和議成則歡飲若弟兄而又何用
也因賂之其人悉與語也先次日善入謁又大賂也
先也先喜坐定善乃前責之曰 太上皇帝朝太師
所使使必三千人歲必再卽穉子亡弗賚者金帛器
服絡繹載道太師乃背盟好而見攻何也也先曰然
則奈何削我馬價又予我帛時有剪裂幅不足者善

曰非削馬價也太師之馬歲益增價亦不繼而不忍拒是以微損之太師自度價所得比前孰多也先曰者者胡語是也復曰帛有一二剪裂幅不足者諸通事爲之也事露而誅矣卽太師所使進馬有劣弱而貂皮敝豈太師意耶也先又曰者者善因復進曰太師之攻我兩矣所磔殺剝剔以數十萬計而太師之部曲寧無有血吾刃者上天好生太師獨好殺夫是以數有雷警今者能奉 太上歸我和好不絕器幣溢於穹廬而黎庶彼此俱逸不亦快乎也先益喜曰者者因謂善歸而 太上皇有重寶來購乎善曰太

師得重寶而歸我 太上皇天下後世謂太師貪重寶也歸我 太上皇而不索重寶天下後世以太師貴信義而賤貪黷令名奕奕况我之德太師無已而重寶以漸繼乎也先大悅曰者者遂以善見 大上皇善再拜進醪稱問萬壽侍立不敢坐也先數目 太上皇太上皇謂善太師與汝坐則坐善頓首辭曰君臣之禮雖草野寧敢廢哉也先嚙指顧其下曰咄咄汝曹中國禮乃若此遂以輕騎奉 太上皇與善歸歸而 上以非初遣旨薄其賞僅遷左都御史仍領寺事而大司馬謙心許之時 太上皇在南宮元

旦朝正出復且修投謁善復泫然曰 太上皇不受
賀何我曹乃相賀也識者益稱之善始善中貴人振
後善中貴人吉祥等而與石亨比會 景帝病善知
亨吉祥有迎 太上皇謀遂與之合 太上皇卽位
論善功封興濟伯予誥券世世承襲收領左軍都督
府尋加禮部尚書領部事恩賜赫奕所陳請無不允
又嘗陰薦李賢入內閣而定襄伯郭登亟疏善使虜
功請位之三公於是亨吉祥稍稍間於 上而明年
善已卒年七十五贈興濟侯謚忠敏子宗自勲衛襲
四歲例奪爵爲金吾衛指揮使孫增尚公主授駙馬

都尉

李 敦

李敦字居學順天府涿州人生五歲始能言爲州學生永樂癸未經魁入國子監因言事切直受知 仁廟命有司給以脚力每朔望率諸生朝見後授京衛經歷陞戶部主事歷禮部員外郎持已嚴厲臨事剛決銳於建立十七年陞江西右叅議所至吏奸民隱纖微洞燭號令必行無能撓者宣德二年陞四川右布政使益礪廉隅官中物不私一毫志鋤奸豪有犯法者繩之不少貸蜀人稱爲鐵面李在川中十六年

威惠並行治體用張正統八年召爲吏部左侍郎協
王文端公直持衡公平人有定守後以疾卒於官

韓定

韓定字世安號靜菴其先居廣平威縣曾祖某洪武
初從征有功陞錦衣衛千戶因家京師定生而質確
好學不倦正統元年以儒生選入翰林院習學夷字
八年精於業授鴻臚寺序班十四年隨駕親征景泰
元年選入內閣辦事三年以兼精楷書陞中書舍人
天順改元差雲南報訃還陞吏部驗封司員外郎成
化初入史館修英廟實錄及大明一統志成以預

有勞陞本司郎中提督四夷館事十二年陞太僕寺少卿授中憲大夫誥命十三年史館續資治通鑑成以預有勞陞食正三品俸二十一年陞本寺卿定自幼事親孝處兄弟友愛親有疾躬視湯藥衣不解帶既卒哀毀骨立依禮殯葬天性儉約雖祿漸豐平居飲食衣服宅第器用未嘗奢靡至於姻族鄉里有貧不能嫁喪不能葬凡窮獨無告者則極力周恤無所吝居官四十餘年在內閣書制誥朝入暮出無或少怠處僚案以義待生徒以禮一時入館習夷字者無不暗曉天順間英宗皇帝詔求通夷字者大學士

李賢以定應詔入奏夷音譯字之說 上悅賜寶鈔
錦綺一日造朝適曹欽反殺朝臣定避難民舍適有
火千戶同與避匿亂定各散火被讐家誣執爲欽黨
擬死罪臨刑訴言與定同避定力爭火遂得釋成化
乙巳卒年六十有九賜祭葬

冀傑

冀傑東安縣人由行伍從 太宗皇帝靖內難以功
累陞左軍都督府都督僉事屢從北征 仁宗皇帝
嗣位命守開平宣德元年進左軍都督府右都督尋
卒追封清源伯謚忠壯傑資性平直無所矯飾屢從

征恭勤不懈明於知人高煦反 上親征列侯中有
陰持兩端者言高煦機變不測用兵若神傑揚言於
衆曰吾知其爲人矣徒尚詐而無膽氣今天威臨之
卽震懼就擒矣何神之有竟如其言衆服其明云

毛勝

毛勝字用欽薊州人天資剛毅風神俊偉有膽氣善
騎射於凡兵書悉通大義宣德辛亥以父安泰陞
都指揮使正統辛酉從征麓川入其境賊酋力招漢
伏兵於路勝將遊兵覘之射其象馬應手而仆遂敗
其衆督船濟江直抵其巢穴走其賊首思任發破寨

而還以功陞左軍都督府都督僉事明年奉勅克右
叅將復征麓川勝益思自效勇氣當百平其寨柵而
繫其黨與前後無算還進都督同知己巳秋大同有
警勝適公幹嘗遇寇於道生致數人以歸尋復委勝
巡視邊城屢敗賊衆朝廷嘉其功進左都督往紫荆
關倒馬諸關追殺虜寇累有金帛之賚是歲冬奉勅
克左副總兵往征湖廣貴州苗賊凡下百十餘寨賊
皆敗散景泰初重安江苗寇復叛總戎者有難色勝
慨然當之卽日以兵壓其境旣與敵遇勝獨發一矢
中其酋而斃餘賊驚潰由是香爐山諸寨苗賊皆望

風警服生擒僞王韋同烈等械送京師斬之西南夷
之患遂息壬申委勝鎮守雲南金齒騰衝諸處論功
封南寧伯子孫世襲賜以誥券勝在鎮號令雖嚴而
御軍撫夷率以仁恕酋長聞風歸嚮無梗化者明年
將兵詣金沙江械賊子思機發送京師又明年餘寇
才放革復叛勢甚猖獗勝率精兵突至騰衝賊不暇
爲謀遂生繫才放革餘衆悉竄伏事聞獎勞有加益
倚賴方殷而勝已邁疾不起矣享年五十有八

張敏

張敏永清縣人中宣德壬子科鄉試登癸丑科進士

歷官給事中以才幹聞擢工部侍郎敏倜儻不羣博聞強記居官不畏彊禦嘗忤逆振幾被排陷然無隙可乘竟不能加害曹文忠于肅愍雅與孚契名重一時在工部三載而歿勵尤多天順元年致仕

李震

李震字用初別號省菴先世山西臨汾人元季曾伯祖希賢遊宦於燕因家宛平祖嘉永樂中累官禮部左侍郎震天資穎敏自幼嗜學以廕補太學生領宣德乙卯鄉薦正統改元登進士選庶吉士讀中秘書力行問學詞林諸公深器重之改工科給事中職務

修舉嘗持節往河南 親藩行 冊封禮餽遺一無
所受癸亥陞右給事中戊辰丁艱己巳虜寇犯順京
師戒嚴奪情起震守東直門辛未陞通政使司左叅
議適南京通政缺遂改蒞焉戊寅陞南京兵部右侍
郎成化丙戌 召改兵部踰年陞左侍郎進階勳正
議大夫資治尹食正二品俸辛卯奉 勅巡視紫荆
關一帶山場置立界牌禁養林木衛護關隘防禦賊
寇還奏稱 旨壬辰清理武官貼黃甲午忽邁瘡疾
竟勿起震賦性醇厚才識高邁居家孝友蒞官勤慎
任兩京所至除弊興利政聲籍籍尤厚於故舊冬官

孟侍郎初任南京任部堂後廡忽得疾卒同官諱之
移歛廡外震往吊歎曰孟公生爲卿佐死可委於此
乎立命昇還舊寢宛平陳定與其祖爲友及歿其弟
安留金陵年老家貧且食指衆弗克返故里震至卽
爲助舟車歸之其急於尚義類此

殷謙

殷謙字文撝涿州人中正統戊午解元登己未進士
授戶部主事陞兵部郎中遷右通政出知太原府晉
人儉嗇褊急號稱難治謙寬猛得中至今民思之歷
陞左布政使召拜右副都御史撫宣府猛將悍卒

莫不馴服陞戶部侍郎尋轉本部尚書財賦充足軍國賴焉進太子少保致仕家居唯賦詩飲酒日遊別墅人比之文潞公居洛云

芮 釗

芮釗字宗遠其先世居應天溧陽父琦徙家順天之寶坻遂爲寶坻人正統壬戌登進士觀政都察院掌院事者見釗姿宇魁梧及試刑名輒出倫輩甚器之奏請遴選進士爲御史得二十有四人釗其首也授河南道未幾掌道事是道分隸皆劇司兼考覈郎署以下及畿內百職政績激揚有方考察明允一時聲

名籍甚嘗奉命按治遼東河南江西所至持風裁鋤
強擊貪不少寬縱吏民惕息畏服其在江西能聲尤
著蓋江西地大民衆訟獄繁劇釗處斷明敏庭無滯
囚不踰時令行禁止闔境清肅旣代去良善懷慕不
忍舍居無何 朝廷擢釗按察副使從民望也釗至
振揚風紀有加於前頃之以外艱去任江西十三郡
之人羣訴於部使者異奪情蒞職部使者以聞事寢
得終制起復遷陝西右布政使陝西地方接戎虜三
邊嘗屯重兵供餉爲難釗夙夜盡心區畫有方邊儲
以足明年進左布政使天順丁丑召拜都察院右副

都御史仍食從二品祿奉 璽書巡撫甘肅地方至
則首詢兵民利病而罷行之其於練士卒謹斥堠精
器械廣儲蓄尤盡心焉庚辰以丁內艱聞 朝廷重
邊計特命奔喪且遣官營葬祭釗襄事始還鎮辛巳
虜衆寇涼州甚急釗率輕騎馳赴涼州不可近復分
部屬散掠莊浪諸處釗隨機應變分兵追勦所向克
捷虜勢屈乃遁去是時虜出沒邊境幾一載而城守
無虞居人不致流散者釗調度拊循之功居多壬午
以疾卒下人感歎有殞涕者總戎暨中貴視其裝惟
衣服簿書又相與歎服其清操云訃聞 上深悼惜

賜祭營葬如禮

王復

王復字初陽固安縣人正統壬戌進士擢刑科給事中謹厚識大體十年通政司缺官以奏對洪亮特陞左叅議十四年土木之變英廟北狩景帝嗣位尊爲太上皇十月虜酋也先入寇紫荊關時選能使虜迎駕者復請行乃以復爲禮部侍郎中書舍人趙榮爲鴻臚寺卿持羊酒往也先營其弟伯顏帖木兒掇甲冑操弓矢太上帶刀引復等前露刃夾之復等拜訖也先謂復等皆小官可令胡濙于謙楊

善等來復辭歸仍理通政司事 英宗復辟改兵部
右侍郎尋轉左成化元年陞兵部尚書時邊患漸興
衆議戎政非其所優特改復爲工部尚書加太子少
保在部謹法識體又善節縮財料聲名勝於在本兵
時有中官怙寵市恩以結人心令騰驥左右等四衛
無名奏乞力疏止之一國師病且死語人云吾示寂
在某日某時至期不死余子恥其不驗潛絞殺之凡
法王國師死中國者例該營造墓塔復奏言此僧平
素受國賜賚積蓄頗多宜以營造墓塔不須動煩縣
官人以爲得宜十六年致仕卒贈太子太保謚莊簡

李侃

李侃字希正順天府東安縣人正統壬戌進士授給事中進都給事中己巳之變一時言官奮發言事侃居其間多所建明景泰中嘗面糾戶部尚書金濂格詔徵歛罪有旨宥之侃膝行近前厲聲言濂罪不可宥遂下濂獄易儲議下侃與林聰等初不肯署名既而不得已乃署選官僚以侃爲詹事府丞聰司直郎時史館欲採宋元事實做朱子綱目例續其書奏選文學之士充纂修官侃與焉書未成而英廟復辟改太常丞丁外艱改太僕丞進少卿未幾陞右僉都

御史巡撫山西兼提督鴈門等關首奏巡按御史李傑不職傑坐除名貪墨者望風欽避有生擒虜酋小石愛子者虜備駝馬來贖侃請歸之以結其心從之時方無事侃於固圉廣儲選將厲兵之外專以變化風俗興起人心爲政時時有所建請施爲多合人情惟欲令吏胥服儒巾以變革其心頗近於迂尋以丁內艱解任軍民擁留至不得行服除再陳休致如所請年七十有九而卒訃聞遣官諭祭常例外特賜葬侃氣節方剛論議持正無所回撓好學嗜書平居手不釋卷性尤孝友事親備極孝道虜犯京畿二親在

容城請告冒白刃迎之人以爲難晚年家居貧甚死之日幾無以爲殮子二人中進士德恢爲嚴州府知府德仁刑部員外郎

董方

董方字仲矩灤縣人正統甲子乙丑聯第授大理寺評事陞左寺副未幾陞左寺正法律精明濟以仁恕以故滯獄沉寃多所伸辯時有巨室被盜方捕時東阿縣民蔣傑適與賊偕行因併執縛傑吶不能辯以拷掠遂誣服方廉察之證驗皆明遂出傑神策衛軍詐稱錦衣旗校奏旨誦事誑取人財事覺有司以

詐傳 詔旨論應死方以彼冒名誑財耳傳 旨無
實跡因得減論金吾衛卒領銅內局中道竊符板尺
許邏者得之有司以盜內府物律斬方以物既領出
非潛入內府盜者宜以監臨自盜論遂減從徒其諸
平反咸若此景泰乙亥屢災異 朝廷以濫刑爲憂
乃 簡廷臣往讞諸處獄方得山西時太原民白政
與邑人王選構怨殺之投尸於河事覺政復誣選妻
與已通同謀殺旣成獄方疑彼爲夫婦三十年生子
十餘人安得有此乃盡拘鄉隣質之且以事跡語言
反覆覈驗始得其情政遂服選妻得免天順丁丑陞

本寺右丞時忠國公石亨用事熏灼中外或謂一往見薦揚可立待方抑之曰士貴氣節屈千金軀忍恥以要權貴吾弗爲未幾出其門者果皆敗聞者服之庚辰曹欽謀逆舉兵焚闕方及同官李賓急趣軍士救護曹竟不能害賊平李遷左都憲方遷本寺右少卿執法持正衆論皆平成化乙酉遷刑部右侍郎癸巳遷都察院右副都御史理本部事甲午巡撫大同節制諸軍事至則飭官吏謹備禦嚴操練清屯種籌略多方士卒用命甫數月風聞於虜戒勿南向以刑部尚書召還京建言十五條皆邊務上嘉納之乙

未 上策士殿前爲侍講官丁酉乞致仕進階資政
大夫既歸杜門謝客人罕有見其面者成化十九年
卒壽六十有八贈太子少保謚襄敏

李 賓

李賓字廷用號敬菴順義縣人正統乙丑登進士授
浙江道御史丁卯觀風兩浙深得憲體己巳值邊關
有警往大同察看虜情虜寇深入奉 勅召募河南
懷慶諸處民兵得壯丁萬餘操練以法軍威遙振虜
遁去庚午陞太僕寺卿賓釐革宿弊馬政爲之修舉
癸丑陞右副都御史提督永平山海諸處軍務兼總

糧儲凡關隘城堡器械車馬無不整飾戒嚴以時無
事乃散兵歸農籍其糧歸官而屯田之利以興 英
廟復辟首召爲廷尉各該衙門相沿以竊盜罪囚遇
赦宥俱免以革後所犯論爲初犯免刺發審實具題
律爲萬世常規赦係一時恩例今盜賊日多律法從
減事發問擬做工往往隨卽在逃仍復爲盜見問者
未結而犯之者卽至若欲彌盜以安民必須依律而
坐罪宜通以革前革後准三犯論絞開奏定奪永爲
遵守又因刑部擬罪太刻具奏用法莫貴於寬平發
落莫患於不一用法寬平則人易信服而法亦可恆

法不一則難以奉行而民亦無所措手足矣疏中歷
舉失刑者數事朝論譴之己卯丁母憂上遣官葬
祭卽詔奪情庚辰父病甚陳情乞視上俞允之
至家而父逝居喪哀毀盡禮遣官諭祭乞守制於家
辛巳春特詔起復視事是歲秋曹欽謀爲不軌躬
率家人子挺身擊之於長安右門撲滅火勢爲英
廟所知深蒙眷顧遂有右都御史之擢及總憲度言
聽計從百僚振肅甲申進階資政大夫尋陞南京兵
部尚書叅贊機務受命之初見餓莩載道首以民食
爲急奏發倉廩賑貸賴以全活者甚衆復令有司各

設常平倉俾饑饉無流移之患時有鹽徒乘巨艦張
旗幟數出江上大肆劫掠往來商旅患之乃嚴督操
江將士捕獲渠魁餘黨悉平叅贊數年奉 璽書二
十餘道夙夜王事未始怠忽丁亥上章乞歸不允進
階資德大夫正治上卿己丑以九載考績朝京陞左
都御史總治憲臺見荆襄流民嘯聚嘗建白處置至
今地方賴以無虞癸巳進太子少保仍兼前職丁酉
乞休時年六十有二優游林下者幾十年置別業於
鄉山日與故老徜徉詩酒間乙巳春忽沾微疾竟弗
起訃聞 賜祭葬如例贈太子太保謚襄敏

岳正

岳正字季方灤縣人修頤美髯神采秀發氣屹屹不能下物舉京闈鄉試卒國子業李文忠時勉爲祭酒簡四方名士置講下正與商文毅彭文憲王端毅諸公皆預焉正統戊辰會試誤寘落卷侍講杜寧見之曰此我輩中人遂擢第一廷試賜進士及第授翰林院編修景泰壬申選右春坊贊善天順丁丑改修撰英廟廉知其名召見文華殿遙見遽嘖嘖稱歎旣陞陞登殿問年若干問何處人問治何經問何科進士上益欣悅不已遂以內閣叅預機務且曰凡

事爲朕主張許彬老矣不足恃也正赴閣石亨張軹愕然不平力於上前撓抑而上不聽宣召賜賚絡繹於道正感上知遇銳意功業知無不言言必盡肺腑欽天監臣湯序言變異謂奸臣未盡之故

上以問正正曰奸臣未聞若求之將人人自危且序術疎淺不足信事遂寢錦衣官校邏一僧自言當大貴衆惑之至妻以女以覬非分獄具僧坐反叛太監牛玉援例請官邏者正謂事縱得實不過合妖言律耳活其從十數人邏者准應捕律給賞朝廷邏之時亨與太監曹吉祥怙寵擅權有投匿名書指斥時

政者緝捕甚急舉朝惶駭亨勸上自撰榜格緝捕正與呂文懿見上曰爲政有體捕盜賊責兵部奸宄責法司豈有天子自出榜購募之理且堯建進善之旌舜立誹謗之木秦始護非杜諫乃下誹謗妖言之令由此過失不聞卒至亡國陛下新復寶祚正當以堯舜爲法以秦爲戒縱窮治其事緩則人情怠忽事自覺露急則人情恐懼愈求韜晦不如勿究吉祥從旁請究甚力上徐謂曰正言是也亨從子彪鎮大同遣使獻捷內閣詢其狀其人盛陳戰伐且稱斬首無算皆梟於林木不能悉致正取地圖指示

日某地至某地四面皆沙漠梟於何所其人驚伏正
間爲 上言曹石勢太盛慮有變宜早爲節制而二
人怨之益深會承天門災 上下詔責躬實正視草
歷陳弊政詞極切直天下傳之遂有蜚語指爲謗訕
七月 內批降廣東欽州同知道漵以母老留閩月
尚書陳汝言曹石黨也憾正嘗言其不可用至是嗾
邏者以私事中之逮繫詔獄拷掠備至謫戍肅州鎮
夷所京第遂爲幸臣季鐸所奪至涿州夜宿傳舍手
梏急氣奔且死涿人楊四者頗尚意氣哀求解人怒
不肯楊醉以醇酒伺其熟睡以酒噴封印就炙之紙

得燥皆昂起乃去釘脫桎剝其中復釘而封之其人
覺有異楊曰業已然矣因賄以數十金正乃得至戍
越五年曹石俱以不軌敗 上謂內閣李賢曰向岳
正固嘗言之賢因請曰正有老母得放歸鄉里幸甚
命釋爲民甲申 憲宗嗣位起正充 經筵講官纂
修 先朝實錄會廷薦正爲兵部侍郎與給事中張
寧名並上已俱被譖遂皆補外正得知興化府時論
譁然不平正才大不屑條格動輒爲闊遠計至興化
正察民間利權而操之府於是建澄江書院及孔子
廟鑄祭器下諸縣作小西湖開兼濟河築南北隄塞

白埕港別購民田開河直趨江口修江口橋他如通
津鐵河猴溪諸橋多修治而白埕功最鉅復購穀實
饑民倉出羨餘以補料價民輸料京庫類多侵尅正
親爲會計且教之納省其半費士大夫家食利於官
者皆弗得於是貴有力者共騰爲謗書橫不可遏惟
彭惠安韶陳太常音保其無他而正亦厭於吏職以
成化己丑入覲京師因引疾致仕時季鐸已敗朝
廷還其故第壬辰九月卒年五十五正於書無所不
讀謂天下事無不可爲俯視一世其爲文高簡峻拔
追古作者詩亦雅健脫俗字法精邃大書尤偉旁及

雕繪鐫刻悉臻其妙嘗戲畫葡萄遂稱絕品晚好皇
極書有所論述及經解皆未及就惟類博稿僅存十
卷行於世深衣纂疏一卷藏於家

何盛

何盛大興人由舉人爲六安州知州景泰初陞知高
州府公明剛直抑強扶善興利革弊禁淫祠絕巫術
自是百廢修舉所屬奉法又建讀書帷於府學之中
以較士設排柵於城外以保障居民時胡虜犯邊諸
蠻效尤肆其荼毒高涼地連廣西蠻寇越境必此先
至時炭山賊來劫擄坊廂生靈血腦塗地者若干人

盛乃召邑令談祥暨坊老莫暹等于堂共謀立柵開塹密種刺竹以防禦之衆以工浩力寡恐弗克濟盛曰是非爾所知也遂命民壯率其居民採木爲柵掘地爲塹繚以竹刺盛躬臨經畫不憚勞瘁僅及兩月而完計七百九十餘丈建鼓樓鳴柝以防晝夜設保民寧江靖江清江四門以嚴出入賊知其然雖連歲鄉村流劫終不輕至迨天順己卯臘半賊聞盛往述職又來犯城荷梯欲從東入阻於刺竹柵塹之險棄梯而退城廂均賴以安

陳壯

陳壯字直夫其先越之山陰人父簡成交趾後移京師隸籍京衛壯生時骨相奇秀父愛之每抱與人曰此子宜當還吾鄉也年二十中景泰丙子順天鄉試二十七中進士授南道御史壯素有直氣不能阿世求合讀書亦務寔踐有用於已至南道未久翰林章公懋莊公昶黃公仲昭俱諫鼇山謫官壯慨然疏章力救得改謫爲御史數年輒上章不絕其大要從根本之說直欲置國家於無窮之休而人有不能盡知者一峰羅公倫居官南都與壯極契厚及持父喪壯與倫計處喪事往復周悉壯輒身行之倫常歎服其

勇扶柩歸山陰營葬事畢卽結廬墓山不復與世交
涉居三年人有不知陳直夫者成化辛卯服闋僦居
錢塘士大夫每稱之曰浙士居喪如古禮者惟見少
保于公及今陳御史耳至京復以母徐老乞南道便
養上書論中官汪直尚書姚夔苗守朱儀言皆剴切
激厲有益治道乙未母徐卒居喪一如居外艱時復
起爲御史遷江西按察僉事壯念父母卒後雖官不
爲榮遂乞歸居鄉卽如鄉人不復知爲御史時布袍
蔬食於清江之浦作鷗沙亭讀書其中爲老焉之計
踪跡寡出非公事未嘗入城府然風采凜然鄉人仰

之有司亦嘗懼其知不敢輒移曲直良民善衆玩心
高明見道益切祀先訓後皆足作世典則弘治丙辰
南京吏部尚書張公悅薦爲福建按察僉事辛酉擢
河南按察副使隨職必有發明而剛直之氣不衰且
復有仇之者矣刑部尚書林公俊爲都御史時特舉
壯自代然人之知壯者終寡癸亥遂乞身還時年六
十六歲至甲子仲冬卒於家

秦敬

秦敬字克恭涿州人正統戊辰進士授刑部主事進
郎中陞浙江右布政使轉左以憂去服闋復除福建

左布政使推右副都御史巡撫貴州夷人戢服以病告免歸年纔五十三家居十餘年卒賜祭葬如例敬爲人羸豪喜自矜然臨事精敏有果斷通曉政術自郎官一蹴至方伯歷任閩浙民多喜而譽之

朱銳

朱銳通州人天順辛未登進士少貧爲州庠生嘗宿學舍同舍生失銀簪者誣銳竊之銳不與辯償以銀後同舍生於他處得簪乃愧還其銀又曾於儒學門前拾得金銀器皿一袋俟於學門候其人至詢得其實歸之其人感謝以金竟不受歷官工部郎中每過

鄉里至州城西郭外卽下馬步行遇間里親識無貴賤貧富一以禮接之鄉人至今稱仰

段正

段正字以中號介菴家世出山西澤州宣德間其祖始籍錦衣居京師正爲文敏瞻七歲賦鸚鵡已有奇句由京學生領鄉薦第一人明年登進士令元城

召拜監察御史河南江西兩奉巡按之命遷浙江按察司副使尋坐累謫柳州同知繼丁二艱改汝寧進擢荊州知府旋陞江西左叅政元城劇邑訟繁甫至卽罪其尤日勤聽斷獄無留滯邑歲有水患憂之走

視地形多方疏塞至忘晝夜竟賴以安秀藩就封侍
徒多橫索獨至元城戢不敢肆費視他邑省七八爲
御史持大體舉劾率時政之急小故不瑣及出巡三
司輒屏息貪墨望風而遁吏書斥以千計嘗覈邊儲
積蠹悉剔出不知有權閹有勢家子弟江西歲薦饑
闕盜起賑理隄備布約束四十餘條嚴而有要得無
事尤明於知人所舉劾無不確服者巡按例歲一更
再留江西一年而假以巡撫都憲之權前所未有浙
西水大溢亟規畫督郡邑埽治數百里民免漂溺而
鄉曲武斷之豪無有逃於法者汝寧科率重民病無

告力爲爭於守得損三四荊州在遼藩封內宗屬多
撓法道路以目憤不顧疏奏移幽松滋三將軍於中
都而遠安長陽二郡諸將軍中尉俱削官祿郡境遂
寧吉興岐雍四府第肇建費不浮而告成速贊襄功
居多再臨江西時嶺北九江多盜南昌湖西多訟分
歷勸治芟獮易於破竹而大利害興除尤力撫州有
糧長厲民甚立破其家追贓至數萬廣信苦夫役繁
以寺觀稅多有餘積者籍使出傭直民少甦凡舉行
多類是葢正精吏事能斷簿書率躬自檢察姦黠無
所售治惡雖不貸然惟其罪不事文致以故所至吏

畏民懷嘉聲勃蔚汝寧江西聞其再來多瀝酒相慶
巡撫藩憲上其治行章前後亡慮數十生平嚴於自
律寡言笑基酒無所好服食無重帛無兼品清勤廉
介夷險始終一致自入仕來先廬久餽無一椽一瓦
翔學業該博深厚於書無不讀恒以通儒自期少暇
卽卷不去手所著有介菴集三十卷宦遊紀十卷栢
臺公案十五卷課程日記三卷弘治戊午卒至無貲
以殮無冢以葬年僅五十有八

展毓

展毓字鍾秀徙自鳳翔之岐山居京師家故貧始爲

蒼卜術已而棄不事事舉子業遊順天府學天順丁
丑舉進士擢河南道監察御史三載階文林郎兩按
藩鎮皆有譽其在山東剗奸刮癘十去四五民無賴
詭爲僧遊食市中者甚衆悉驅之耕時有欲傾之者
陰縱人狙之撫掇無所得毓益嚴戒立崖岸爲之吏
民無敢犯其在朔方有中官出鎮橫歛荼毒人莫敢
抵牾毓首爲狀白都御史奏之彼竟得罪去大同萬
全之間有牧地數百里析兩地兵民居之衆侵攸擾
亂手挺與刃相殺有司莫能制毓掘地爲塹數里抵
南北山麓中分之戒不得過乃已時戎政廢弛命尚

書王竑及毓理之乃閱士卒壯勇者復營爲十二置
長若屬居則共習戰則俱往其爲法最良尚書去十
二營遂廢後乃復爲十二營馬之在畿牧者民多以
略爲奸其名僅存實喪其三之二不足用毓與給事
申一人偕受命往治之責太僕之不任事者劾罷其
丞六人其在道考覈爲多毓風義凝重嶷然不挫於
物其有不合者雖貴勢必與之抗人皆以爲難毓真
能御史

李紳

李紳字縉卿其自號曰抱犢山人世居徐之沛縣後

徵至京師隸錦衣衛籍生而朗潤數歲能屬對人爭
誦之舉成化乙酉鄉貢連捷丙戌進士授行人司行
人數奉使足跡徧天下聞見益博九載考最遷戶部
員外郎郎中其所領司最劇書簿立辦時貴戚方盛
有所干請力爲摧抑尚書李公敏薦爲光祿寺少卿
意氣勃發遽懼猜忌會考覈京朝官調知山西之忻
州忻其所嘗奉使地方不欲往上疏乞致仕再上未
允復疏乃得請榜於座曰五斗懶將雙膝屈三章乞
得一身閒論者賞其志因惜其才之不盡見也紳舊
居城南徙禁籞西偏已乃復故業間歸沛置屋數楹

歲取儻直忽燬於火又無他貿易歲費且不給持以勤儉未嘗見言面喜讀道書手自抄錄至盈箱篋或訝之笑而弗答與客觴咏投壺戲象或雜以諧謔文采逸發獨不及官府事紳素篤恩義兄玄爲道士晚得疾迎於家躬視湯藥歛葬如禮丁氏妹寡而無子周卹備至其與友人交接率以信誼相尚人咸欽之年六十有六而卒

劉瓊

劉瓊順義人登成化己丑進士爲御史時獨持風裁不避權要陞山西布政司叅議時屬下有主簿貪墨

狡黠畏其廉明以賂陷其吏實中傷於瓊果爲所陷
遂不辨而歸居鄉破屋蕭然至自拾馬通以給爨

王信

王信順義人字中孚成化戊子舉人爲弟子員時每
撫几歎曰讀書不致君澤民安以讀爲授延川縣知
縣延川民俗驚獷信召其巨室戒諭懇至凡蠹於政
者革之益於民者亟行之不逾歲化洽俗變臺院交
章薦揚遂調咸寧縣延川之民遮擁行車共樹去思
碑以紀惠政咸寧負郭藩省軍民相叅政績懋著方
將起擢遽以病引至廬氏而卒

田景賢

田景賢字宗儒涿州人成化乙未進士初任給事中
值貴戚慶雲伯周壽用事景賢首倡劾之上震怒
廷杖幾斃猶極言不諱未幾擢通政叅議累奉命
查理邊儲經略戎務建裁咸切時宜官吏非貪虐顯
著者務在保全輿論稱爲長者繼陞太常少卿復掌
通政司後加禮部侍郎尚書仍掌太常寺事進太子
少保賜玉帶麟服皆出特恩當逆瑾絃國時奴視諸
大臣景賢長身玉立簡靜自持終瑾之身竟不能中
傷上疏懇辭乃進太子太保賜寶鏹馳驛歸仍令

有司月給役廩卒加贈太子太傅祭葬如例

王傳

王傳寶坻人生有異質大父徽州司獄某謂其父縉
曰是兒骨相當貴囑其母護愛惟謹既長廣領疎髯
性資高朗領成化辛卯鄉薦以乙未進士爲山東武
城縣知縣下車值歲侵民多流亡縣帑廩罄竭移文
兗郡得銀二千餘兩移檄殷富得粟麥二千餘石布
帛二千餘匹以需賑給民賴全活人稱其仁惡少殺
一家七人獄久不決傳廉得其情抵於法人稱其明
以是有良有司之稱甲辰拜御史多所論列風紀肅

然初使南畿察馬政繼使遼陽又按關陝按江西皆
悉弊端著能聲深得憲體時江西多事傳毛舉細故
無不悉於慮必欲無歉以是有良御史之稱然亦以
是得勞瘁疾慮不能支遂上疏乞歸冀優游林下以
畢餘年而竟不起壽纔四十有四

劉機

劉機字世衡大興縣人大父中敷官戶部尚書兼太
子賓客父璉官遼東苑馬司卿十歲卽喪母哀毀如
成人稍長就傅不事嬉戲老長異之苑馬公初爲光
祿卿例廕子爲國子生以屬機辭曰弟相早失恃請

以命相苑馬公喜後雖以左遷中寢然人皆多機之
讓馬苑馬卒於任機時爲學官弟子徒步往護喪歸
遂卜葬族人泥於陰陽家言各以生年與葬期相值
久不克葬陸禮部淵之來弔問故族人具道所以機
從屏後趨出泣拜曰願以機生年所值月日葬父陸
頷之乃克葬成化丁酉舉鄉試明年第進士改翰林
院庶吉士授檢討弘治己酉轉修撰辛亥 憲廟實
錄成進侍讀直講經筵戊午 武宗出閣進學命爲
講讀官尋轉侍讀學士明年日侍經筵講讀會典成
遷學士乙丑充廷試讀卷官 武宗登極進少詹事

兼學士丙寅陞禮部右侍郎轉左未幾入內閣典誥
勅兼實錄副總裁繼轉禮部尚書明年丁繼母憂服
闋拜吏部尚書加太子少保居數月乞致仕從之壬
申起爲南京兵部尚書叅贊守備機務甲戌再乞致
仕疏三上許令馳驛歸以尊徽號晉階榮祿大夫家
居九年乃卒賜太子太保賜祭葬特厚機仕三朝歷
踐華要同考會試主考應天鄉試并會試者各一教
庶吉士者再自侍郎至尚書皆兼日講銀幣冠履金
玉束帶之賜不一而足機長身玉立音吐洪暢見者
生敬爲詩文惟取達意不事雕琢在翰林時本業之

外從事律學每取法家所謂疏義者細書各條之上
蓋志在建立不屑章句間也喜談名理疊疊不倦善
辯者莫能奪代世子以酗酒革爵卒後 朝廷葬以
世子之禮已而其子嗣玉以追封請且欲祔廟下禮
部集議不可機以學士與議曰葬以世子其罪已原
進封固宜既可進封不可廟享乎况 伊府亦有故
事宜從其請議上可之在吏部適逆瑾用事之後忠
賢放逐流品混淆機洗雪振拔銳意甄別所用多當
其才流賊犯江上機謀於同事諸公曰今日之事惟
擇主將立賞格修營柵卹軍士爲急時李都督昂自

貴州罷鎮還南京方遣人邀致之而委重焉李以未
得朝命辭機曰朝廷勅諭我輩有曰凡勅內該載不
盡者爾等從宜區畫此卽朝命也亟取瓦屑壩竹木
爲營柵使沿江軍士免暴露之苦又欲發官帑銀七
千餘兩犒軍諸公皆猶豫機曰某當獨任遂草奏行
之防守有備人心以安旣歸自南京日與故舊飲笑
爲樂機性孝友事繼母甚謹苑馬公所遺孤待之甚
有恩禮雅尚儉素薄於自奉無世祿之習別號樂忘
人因以稱之

張恕

張恕霸州人成化辛丑進士初知夏津縣禦水患闢
荒田民立碑頌德行取擢南京山西道監察御史以
內艱歸除補貴州道巡按陝西克平哈密陞河南副
使雲南按察使繼陞南京操江都御史工部尚書卒
於官恕天性廉介居官二十年所得俸祿俱散族親
產業自祖遺之外未嘗有所增益卒之日幾不能殮

燕忠

燕忠字良臣薊州人成化甲辰進士授常州府推官
以內艱歸服除改寧國府兩郡故多豪右莫敢窺其
庭戶凡所讞獄多平反民某賈於江淮間其僕偶有

過被笞怨家嗾之遂與僕殺其主於采石因盜其貨
愬於官罪人久不得忠廉得其情捕而鞠遂伏辜郡
大旱承檄發官廩賑恤多所全活弘治甲寅被徵爲
福建監察御史旋丁外艱戊午服除改浙江道以災
異陳親賢納諫重名器節財用嚴賞賚諸事言甚剴
切 孝宗嘉納之庚申出按陝西力舉憲度風聲凜
凜雖方岳重臣未假以辭色周歷郡縣不憚險遠賊
吏望風多解印綬去執政者有所親厚被摧折乃病
其苛察壬辰遷陝西按察副使整飭環慶兵備至則
留心戎務日訓練防禦不少懈正德元年擢陝西苑

馬寺卿尋轉陝西按察使發奸摘伏如巡按時禁和
買之弊裁省里甲支費三之一民有冰玉之謠庚午
進左布政使以簡靜爲治往事公罰聚以給用因自
封殖至是一切禁絕瑾賊柄國附者瀾倒陝固鄉土
尤所屬意忠獨無饋遺干謁瑾雖啣之卒莫能害也
寧夏變作經畫兵餉食足而民不勞辛未擢都察院
右副都御史巡撫宣府軍政一新是年冬改大理寺
卿執三尺惟謹不肯少有推移貴近有所請托必正
色拒之知州田崑爲人所訟 上怒其不敬將寘重
典忠屢疏雪其誣竟得釋有胡某者烝父妾因毒殺

父行厚賂祈緩其獄忠曰罪孰大於此牒至輒駁之
屢牒駁會奉 命江西而止江西藩臬官交惡相奏
訐致與大獄久不決忠受 勅往獄成無異言屬歲
饑民重困再受 勅賑濟驗丁口給粟民賴以不死
初吏部擬薦忠爲吏侍及兵侍皆不報或諷使少貶
以求進忠曰大臣進退當以正求而得之人將謂何
竟不及再 命而卒性狷介峭直居常寡言笑不輕
交際人望而畏之有包趙之風焉自奉儉約在仕途
三十年祿入僅供朝夕田園邸舍無所增卒之日囊
無餘蓄贈刑部尚書壽五十七